

Date – 20/10/2024

Time - 18:30 -18:40Hrs

- Mizoram BJP unit chuan minister of state Pu F. Rodinglana leh Assam Rifles te,tun hnai a an inhmuh thiam loh chungchangah sorkar laipui inrawlh turin an ngen.
- Home Minister Pu K. Sapdanga'n kum thar February thla a village council inthlang hman turin inbuatsaihna kalpui mek a ni a ti.
- Tuialhthei man tihniam tura sorkar an ngenna a hlawhchham tak avangin MCVU chuan Nilaini atangin tiam chin awm lova an lirthei dintir an tum.
- Prime Minister Narendra Modi-a'n mit enkawlna, Sankara Nethralaya damdawiin 14-na, Varanasi-ah a hawng.



BJP

Mizoram BJP unit chuan minister of state Pu F. Rodinglana leh Assam Rifles te tun hnai a an inhmuh thiam loh chungchangah sorkar laipui inrawlh turin an ngen.

BJP unit president Pu Vanlalhmuaaka leh BJP legislature party hruaitu Dr. K. Beichhua te chuan union minister of state for home Nityanand Rai hnenah lehkha thawnin Assam Rifles te mipui thlan laka an chet dan chungchangah inrawlh a, mipui thlante leh mipui mimir laka zahna lantir tura hrilh turin an ngen a ni. BJP hruaitute sawi danin minister hi a zinna-ah October ni 12 khan Kawlbem khua-ah Assam Rifles pakhat zu rui ni ngei a hriatin a lo tiding a. A chet dan chu minister leh a hote bakah India hnam puanzar zah lohna a an ngaih thu an sawi a. Minister car darthlang vua-in kaltlang a phal lo bawk ni a sawiin he Assam Rifles pa hi Police in an la a, thubuai siamsak lovin an chhuah leh niin an sawi a, Minister leh amah zuitute hi Assam Rifles ho vek in Ngopa leh Aizawl khawpui luh dawn Bungbanga bulah an lo tiding leh bawk niin an sawi a ni.

Mizoram chu India rama state ralmuang ber pakhat a nih avangin thenawm ram Myanmar leh Bangladesh bakah Manipur a harsatna tawkte'n inhumhimna atana an pan a ni an ti a. Hetiang a nih lai a Assam Rifles-te'n mipui aiawh an lo tibuai ni a sawi chu chhui chian a, thil dik lo a awm a nih chuan a tidiklotu chu hrem nge turin an phut bawk.



DFO

Lunglei Forest Division DFO Pu Lalduhthlana chuan ramhnuai atanga khuaino lak, zawrh leh hralh a khap

DFO hian thuchhuah siamin ramhnuai atanga lak khuai leh khawizu chu 'The Mizoram Forests Act, 1955 hnuai 'forest produce' zinga chhiar tel a nih thu leh khuai lak thin dan enin a rem mai ang tih a hlauhawm a, lo leh huan neitute thlai chin a lo puitlin a, hlawk zawka thar a nih theih na'n leh ramngaw a lo hrisel zawk theih na'n Lunglei Forest Division huamchungah ramhnuai atanga khuaino lak, zawrh leh hralh khap a nih thu atarlang a, tunlaiin ramhnuai atanga Khuaino la leh zuar an awm thin tih hriat a nih thu sawiin, khuaita hi thlai chin leh ramhnuai a thing leh ramhmul chi hrang hrang inthlahpun na'na nungcha pawimawh tak an nih bakah thlai chin leh ramngaw ei chhetu nungcha dang eitu an ni bawk a, khuai hi food chain-a nungcha pawimawh tak an nih thu a sawi a ni.



AMUR FALCON

Centre for Environment & Social Justice (CESJ) chuan lam hla taka rawn kal thin Sialsir sava Mizorama an chawlh chhunga humhalh a nih theih na'n district bawrsap, VC leh central YMA te thawhpui-ah an sawm.

CEJS chuan district zawng zawnga bawrsapte hnenah an district huam chhunga Sialsir leh nungcha dangte thahna, silai, sarawkherh, air gun leh thangte khap turin an ngen a. Mizorama an cham chhunga hlau lo leh thlabar lo a hahdam taka an chawlh theih na'na; lo humhim leh chawlhna tlaka lo enkawl turin Mizoram Village Council president hnenah Mizoram puma VC zawng zawngte hnena hrilh turin kan ngen bawk a, Central YMA hruaitute pawh Mizoram puma an branch-te hrilh turin an ngen bawk a ni. Mizoram mipui zawng zawng hnenah he'ng mikhual, thla hnih emaw chauh cham turte hi dimdawi vek turin an ngen nghal a ni.

Sialsir (Amur Falcon_ Falco amurensis) te hi sahel ei chi sava zingah chuan hriat theih china pem thui ber an ni a. Mongolia, China leh Russia ram atangin thlasik khawvawt tlansanin Africa khawmualpui chhim lamah daih an pem thin. Mongolia, China leh Russia ramah te hian no neiin an awm a, thlasik a lo thlen dawnah Africa chhimlam panin an zin kawng an zawh tan thin a. An zinna kawngah hian hmarchhak state thenkhatah chawl khaw muangin Khuangchawi thla laihawlah hi chuan Mizoram pawh an lo thleng tawh thin a. Pawtlak thlaah hian Mizoram an chhuahsan fel thawkhat tawh thin ni a hriat a nih thu an tarlang bawk.

<><><>

VC POLLS

Home Minister Pu K. Sapdanga'n kum thar February thla a village council inthlang hman turin inbuatsaihna kalpui mek a ni a ti.

Nimina Kawnpui Police station leh Mualvum a First IR battalion hmunpui, Kawnpui leh Hortoki kuate a tlawhna-ah Pu K. Sapdanga chuan, an party in sorkarna chang mahse Village Council tam zawkah party dang VC an la tam zawk avangin hmasawna hnathawh a harsa tih a sawi a. Hei vang hian sorkar chuan hmasawna thawh a nih thuai theih na'n a rang thei ang bera VC inthlan buatsaih a tum a, February thla-a inthlanna nei hman turin inbuatsaihna kalpui mek a ni, a ti.

Home Minister chuan, Police lak thar turah online hmanga dilna thehluh theih turin buaipui mek a nih, thu pawh sawiin, Police indaihlohna phuhru turin sorkar-ah Police hna ruak 1,100 hnawkhah dilna thehluh a nih laiin, sorkar sum dinhmun a that loh avangin police 290 lak phaksak a ni a ti a, kar leh maiah Police lakna tur Advertisement hi tihchhuah tum anih thu leh , Online hmang pawha dilna thehluh theih turin buaipui mek a ni a ti a, mipuiin Police te lakah beiseina an nei sang a, rim taka hnathawh a ngaih bakah mipui nena thawhhona tha neih a pawimawh a ni, a ti bawk.

<><><>

TRANSPORTER STIR

Tuialhthei man tihniam tura sorkar an ngenna a hlawhchham tak avangin Mizoram Commercial Vehicle Union chuan tunkar Nilaini atangin tiam chin awm lova an lirthei dintir an tum.

Mizoram Commercial Vehicle Union (MCVU) thuchhuah chuan Nilaini zing dar 6 atangin sumdawna atana lirthei zawng zawng tiam chin awm lova din ni se tih an rel a. Mizoram pumah kawng a chhiat em avangin maxicab te pawh khaw tam takah an tlan thei lo mek niin an sawi a. Ei leh bar nitin mamawh phurtu truck te pawh kawng lai-ah tlu-in a chhe nasa em em niin an sawi. PWD enkawl kawng chan bikte

chu sorkarin a siamthat thuai an phut tihan sawi a. Company hrang hrangin an enkawl lai kawngte pawh siamtha thuai tura an ngenna chuan awmzia a nei tawh lo bawh ni a sawiin tuialhthei man pung zel nen an lirthei tlantir lo a dintir an titlu ta niin an sawi a ni.

Hetianga lirthei tlan loh an tih chhan hi sawifiahin chief minister-in a thuphunga NGO Coordination Committee leh MCVU te tuialhthei man tih hniam a tiam tawh council of ministers thukhawmin tihniama lova a ngai a kal tlang an rel leh tak si vang niin an sawi. An thuchhuahin a sawi danin MCVU hian petrol leh diesel hi cheng 5 ve ve a tihniama an phut a, NGOCC chuan cheng 3 ve ve a tihlawm an phut thung a. He mi chungchangah hian pawl pahnihte inbiakna-ah NGOCC chuan chief minister-in September ni 1-a tuialhthei man tihtona thupek hi sut a nih tur thu a sawi chu sawi chhawngin chief minister-in NGOCC hnena a thutiam chu pawm ve turin an ngen a. Chuvang chuan nawrh an lo tum pawh chu an sut niin an tarlang ani.

NGOCC leh MCVU-te October ni 10-a an inbiakna-ah hian NGOCC chairman chuan October ni 8-a chief minister an biaknaah petrol leh diesel litre khat man cheng 3 ve ve a tihniamna thupek siam leh tur chuan a man tihpunna kha cabinet thurel a nih avangin cabinet bawkin a ngaihtuah leh a thutlukna a siam a ngai a. Cabinet thutkhawm koh thuai a nih tur thu leh chumi chhung chuan tuialhthei man tihtona thupek chhuah tawh chu hman rih loh (kept in abeyance) a dah a nih tur thu chief minister-in a hrilh ni a an sawi chu pawm ve mai turin NGOCC hian an ngen ni-in MCVU chuan an sawi.

October ni 11-ah MCVU hruaitute hian chief minister hi an hmu bawh a. Hetah pawh hian CM chuan tuialhthei man tihtona thupek sut lehna (revoke order) a tihchhuah tawh thu a lo hrilh niin an sawi a. October ni 16-ah cabinet thutkhawm koh a nih thu leh tuialhthei man tihniama a beisei thu a lo hrilh avangin lungawi lohna an lantir tum chu thulh rih turin CM hian a lo ngen niin an sawi a. Cabinet inkhawm a awm thuai dawn avangin chumi tal chu lo nghak tura a ngenna chu zahin October ni 14 atanga lungawi lohna lantir an lo tum tawh chu an thulh ta niin an sawi a ni.

Hetih lai hian council of ministers thukhawmin petrol leh diesel man tihniama lova a ngai anga kal leh tura thutlukna an siam leh tak si avangin Inrinni a Mizoram Truck Owner Association pisa a MCVU thukhawm chuan Nilaini atanga sumdawng lirthei zawng zawng dintir vek chu an rel thlu leh ta niin an sawi.

<><><>

PM INAUGURATES

Prime Minister Narendra Modi-a'n kum 10 kalta chhung khan healthcare sector-ah ramin nasa takin hma a sawn a ni, a ti. Vawiina a bial, Varanasi-a RJ Sankara Eye Hospital a hawnnaah he thu hi sawiin healthcare tih chak nan kum 5 lo awm tur chhungin medical seat 7500 siam belh a ni ang, a ti.

RJ Sankara mit damdawiin hi mit enkawlina lama lar tak, Sankara Nethralaya, sumdawng lian Rakesh Jhunjhunwala leh United States-a Sankara Eye Foundation-te tangho in cheng vbch 110 senga an din a ni a, Varanasi-a he damdawi in hi Sankara Nethralaya damdawiin 14-na niin thil dang bakah mit zaina theater 9 a awm a, mirethei ber pawhin enkawlina an dawn theihna tura ruahman a ni.

<><><>